

Nakkas kuurõ kirjapandminõ V Uma Pido!

Meil om hää miil teedä anda', et V Uma Pido noodivihk om valmis saanu ni nakkas kuurõ kirjapandminõ V Uma Pido, miä tulõ 2. juunil 2018 Võro Kubijal. Pido om võrokõisi kingitüs 100-aastaga vanotsõlõ Eesti Vabariigilõ. Samal aol tähistedäs ka võrokõisi Uma Pido väikut juubõlit. Pido om seokõrd pühendedü Võromaa vanavanõmbilõ. Seokõrd valisi rahvas pido laulu' vällä avaligul internetihääletusel – ütenuun ummi lemmiklulõ hõisatõn tähistämi' nii Eesti Vabariigi suurt ku Uma Pido väikut juubõlit.

Hinnäst saa Uma Pido kirjja panda kooni 1. detsembrini 2017. Pido oodõtas laulma mudilaisi-, latsi-, poiskõisi-, naisi-, mihi- ja segäkuurõ kimmäle Lõuna-Eesti maakundõst, kon köüdüs võro keele ni kultuuriga olõman. No omma' oodõtu ka kõik koori', kiä laulu' är' opva' ni võro keelest ja meelest ütenu lõunaestlõisigä rõõmu tahtva' tunda'.

Seokõrdki saava' pido ütiskuurõ hulka lavalõ laulma' tulla' kunnakoori', miä pandas kokko pere-, sõprus- ja muiõst kogokundõst. Oodami ka ti kirjapandmisi! **Nõudmisõs om õnnõ kunnakoori liikmidõ viisipidamine ni nuuti tundva juhõndaja.**

Ka oodõtas *nurmõnaisi* ni *mõtsamihi* tüütävide mihi- ja naisikuurõ mano Uma Pido laulõ opma. Oodami viisipidajit **naisi nurmõlt, mihi mõtsast**, kõiki nii küläst ku liinast! Ütenu opitas selges **naisi- ja miihikuurõ** laulu' ni **naisi-mihi osa' ütiskoorilaulõn**. Täpsemb teedüs Uma Pido uudissidõ lingilt www.umapido.ee alatõn 1. novembrist 2017.

Egä koori kirjapandmisõs tulõ Internetin täütä kirjapandmiseht lingil <http://goo.gl/forms/ZKg4N574Mi>. Ku küsümüisi tulõ, või kõlista' projektijuht Tigasõ Merikesele 56916280.

Kuurõlõ, kon latsõ' laulva', mass pido noodivihk 3 eurot ni täüskasunuidõ kuurõlõ 5 eurot. Olkõ sääne hinnan vaihõ tegeminõ kumardus kasuvalõ põlvkunnalõ! **Koorijuh'i saava' uma vihu ilma rahalda.** Ku kuur taht viil otsusta', kas tulla' pido vai mitte, om võimalik koorijuhi vihk kaemisõs saia'.

Noodivihu' omma' saadaval alatõn 12. oktoobrist:

- **Võro Instituudist.** Kõlistagõ Tigasõ Merikesele ette 569 162 80
- **Põlva Maavalitsusõst.** Kõlistagõ Põvvatu Heljele ette 525 62 18
- **Tarto Maavalitsusõst.** Kõlistagõ ette Halliku Astridilõ 564 916 96
- **Posti tiil.** Noodivihkõ hinnalõ lätt mano saatmisõ kulu.

Uma Pido infotunn koorijuhtõlõ om 26. oktoobril kell 16 Võro Instituudin. Osavõtminõ ei olõ sunduslik, no' tulõja' saava' kuulda' pido lavalõ säädemisest ja muiõst ettevalmistuisist, saia' kokko muusigatoimkonna liikmidega, mõnt laulu ütenuun laulda' ni ka uma koori noodivihu' kõrraga kodo viiä'. Oodami' kõiki suuvjit! Ku võimalik, andkõ uma tulõkust Tigasõ Merikesele ette teedä' (merike.tigas@wi.ee, tel 56916280).

Uma Pido ei olõ niisama laulupido. Seo om tii, midä müüdä astminõ hoit meid kaotsiminekü iist üleilmastumisõ tuulin. Tulkõ miika seod tiid käümä!

Uma Pido kõrraldajidõ nimel,

Tigasõ Merike
Uma Pido projektijuht
merike.tigas@wi.ee, tel 56916280
www.umapido.ee